

SUMÁRIO EZEKUTIVU



Membru YEFF, grupu jovem agrikultor iha Hera, Dili / Keith Parsons, Oxfam Australia



Abelita Gomes, fós na'in iha Hera, Dili / Oxfam iha Timor-Leste

Timor-Leste hasoru hela dezafiu boot atu akomoda joven entre 20,000 - 30,000 ne'ebé tama ba forsa traballu kada tinan. Timor-Leste nia ekonomia seidauk bele absorve forsa traballu sira ne'e tanba setór sira ne'ebé bele fornese empregu barak hanesan setór indústriá manufaturasau seidauk dezenvolve didi'ak. Setór agrikultura bele fornese empregu barak maibé evidénsia sira hatudu katak joven feto no mane sira ladún involve iha setór ne'e. Xefe uma-kain agrikultura sira maioria ho idade 40-resin, idade ne'ebé agrikultór no agrikultura sira nia produtividade komesa tun ona. Uma-kain agrikultura sira mos domina ho populasaun ho edukasaun primária no la eskola. Realidade iha kampu hatudu katak Timor-Leste nia produtividade agrikultura kiik liu kompara ho nasaun seluk iha rejiaun Ázia Sudeste.

Iha fatór oin-oin mak influensia joven feto no mane sira ladún involve iha agrikultura:

- Joven feto no mane barak la prefere partisipa iha atividade agrikultura tanba konsidera agrikultura labele sustenta sira nia moris no responde ba sira nia nesesidade sira.
- Joven feto no mane sira hasoru difikuldade atu asesu ba meius produsaun agrikultura nian hanesan ekipamentu no irrigasaun ne'ebé adekua.
- Joven feto no mane sira ladún hetan asesu ba programa hasa'e kapasidade sira ne'ebé halo sira preparadu hodi sai agrikultór no agrikultura.
- Kondisaun estrada sira iha area rural ne'ebé aat halo agrikultór no agrikultura sira difisil asesu ba merkadu no oportunidade seluk iha area rural.
- Inan-aman barak la enkoraja oan sira atu hala'o servisu nudár agrikultór ka agrikultura tanba sira la fiar katak agrikultura bele fó moris ida ne'ebé di'ak liu ba sira nia oan sira.
- Governu ladún akompaña joven feto no mane sira ne'ebé envolve-an iha agrikultura no suporta joven sira ne'e bainhira sira hasoru situasaun ne'ebé halakon sira nia motivasaun.
- Governu fó ona suporta barak ba agrikultór sira inklui fó ekipamentu no fundus maibé la akompaña no ajuda agrikultór sira jere didi'ak suporta sira ne'e atu iha rezultadu ne'ebé sustentável.



Membro TILOFE iha Ermera / Keith Parsons,
Oxfam Australia

• Iha mós persepsaun públiku katak política subsídiu ba sidadaun sira iha kategoria oi-oin halo ema fasil hetan osan no halakon insentivu atu halo produsaun agrikultura.

- Iha mós persepsaun públiku katak joven sira lakohi involve iha atividade agrikultura tanba lakohi halo servisu todan no servisu ne'ebé la fó rezultadu lalais.
- Joven barak bele hetan servisu iha Dili no hetan rendimentu ne'ebé nato'on hodi suporta sira nia moris liu husi servisu iha setór informal no formal sira.

Joven feto no mane sira ne'ebé husik hela agrikultura hodi buka servisu iha Dili maioria sei iha hanoin hakarak fila fali ba Munisipiu bainhira sira haree katak setór agrikultura bele fornese ona oportunidade ba sira atu hetan rendimentu di'ak hodi responde ba sira nia nesesidade sira no hadi'ak sira nia moris. Joven feto no mane sira ne'ebé oras ne'e involve iha atividade agrikultura, involve tanba rezultadu husi produsaun agrikultura bele sustenta sira no sira nia família nia moris. Joven feto no mane sira ne'e mós maioria iha hanoin katak sira la presiza depende bebeik ba inan-aman no ba Governu atu kria servisu ba sira. Joven feto no mane sira ne'e fiar katak sira bele kria servisu ba sira nia an rasik no mós ba ema seluk. Joven feto no mane ne'ebé

involve iha atividade agrikultura mós haree sira nia envolvimentu hanesan kontribuisaun ba nasaun nia dezvoltamentu.

Joven feto agrikultura no joven ho defisiénsia nia partisipasaun iha atividade agrikultura menus tanba problema sira liga ho meius produsaun no mós merkadu. Governu nia programa no política agrikultura balu fó ona konsiderasaun hanesan ba direitu feto agrikultura sira nian maibé programa balu sei fó preferénsia ba mane sira iha asesu ba meius produsaun sira. Programa Governu nian liga ba agrikultura mós seidauk sensitivu ba joven feto ho mane ema ho defisiénsia sira tanba la konsulta ho ema ho defisiénsia sira hodi hatene loloos meius produsaun saida mak ema ho defisiénsia sira presiza no oinsá mak ema ho defisiénsia sira bele asesu ba merkadu. Joven ema ho defisiénsia sira ne'ebé ativu hela iha atividade agrikultura en jerál organiza-an iha grupu ka sai parte husi organizasaun sociedade sivil sira ne'ebé servisu ba asuntu joven ho defisiénsia nian. Joven ema ho defisiénsia sira preokupa katak governu iha ona hanoin katak joven ema ho defisiénsia sira labela envolve iha atividade agrikultura maske iha realidade ema ho defisiénsia sira mós bele involve tuir sira ida-idak nia abilidade.

Governu iha kompromisu boot atu hasa'e joven feto no mane sira nia partisipasaun iha setór agrikultura tuir dalan ne'ebé sustentável liu. Governu fó ona suporta oi-oin ba joven sira ne'ebé involve iha agrikultura liu husi suporta tékniku no orsamentu sira maibé rekoñese katak suporta sira ne'e barak mak seidauk sustentável tanba laiha continuidade. Respondente sira husi Governu rekoñese katak importante tebes atu iha continuidade ba programa sira ne'ebé fó apoiu ba joven feto no mane sira nia partisipasaun iha atividade agrikultura husi governasaun ida ba governasaun seluk. Governu nia programa sira liga ba juventude no agrikultura mós namkari iha instituisaun oin-oin, no seidauk iha sistema koordenasaun ida mak estabesidu atu garante sinerjia husi programa ne'ebé implementa husi instituisaun ketak-ketak hanesan Ministériu Agrikultura no Peska, Ministériu Komérsiu Turizmu no Indústria, Sekretáriu Estadu Juventude no Desportu no Sekretáriu Estadu Cooperativa.